



清英詩集  
卷之三

許棟拜題

蘇東坡先生詩集卷之五

敘

余少困場屋壯歲後始受知諸鉅公獨長洲蔣希甫先生知余最蚤嘉慶甲子先生攝海甯州判事余年十八方肄業仰山書院判署距書院數十步而近先生一見余卽許爲偉器以詩文就質輒蒙歎賞當是時心竊自喜以爲人盡如先生也迨補博士弟子員無所遇則又疑先生譽之過當慙不敢復見先生官浙最久泊余釋褐由山左改官江蘇去初見先生時已四十年浙中官無先生名問吳下士大夫亦無知者意其厭世矣會余



過新城陳登之太守寓先有客在粹不識詢姓名知爲先生大驚喜先生亦驩然道故自是相從凡二年所復得與先生令子雪生游每勸先生刻詩先生曰吾詩顧足刻邪彊之始出敗篋中亂葉畀余編次未及刻而先生歿刻旣竣余奉檄權守彭城值河決胼胝奔走未暇敘而行也余頸舊有疽至是勞甚益劇河流旣復乃乞假就醫里門今秋疾少閒尋向時肄業之地見院中長松參天屹立如故下有茸草依依可愛慨然於先生之不可復見因自念桑榆日逼知者益希而雪生又已歿

謝惟餘婦穉不及今取先生之詩亟爲流布大懼失墜無毫末以報國士之遇也爲太息流涕敘而行之先生少與伯仲兩兄齊名錢塘陳雲伯大令贈詩有吳門三蔣今詩伯青荃年少才無敵之語蓋其詩之論定久矣余不復贅云

咸豐四年歲在甲寅十月旣望海昌許榭拜敘於長安里之行吾素齋



青荃詩集卷一

長洲蔣夔希甫



古風四首

長歌行負薪中道事睽越一自世網嬰遂與故山隔秋  
風怨繁霜白草莽如雪羊腸路鬱盤車輪半摧折豺狼  
飢路旁虎豹瞰巖隙欲進勢不能欲退計焉得英雄乏  
末路鹵莽衆交謫老氏戒守雌毋爲楚咻惑

松栢曷謂固金石曷謂堅滄海昨成路又見犁爲田勸  
君飲美酒兩廂羅管絃奉爵起相壽祝爾千萬年雙丸

去何速烏迅東南天縵山揖子晉吹笛解成仙  
栖栖車馬客擾擾長安道衣冠供奔走夢魂亦潦倒盛  
年甲吾顏日暮益草草三旬九食人清風未云杳寢食  
凋朱顏所苦計非早守貞不違俗煩襟滌如埽古落榮  
晚英餐之可醫老  
燦燦桃李花當春榮其姿孤枝舞黃蜨獨自矜芳時風  
雨會相妒奄忽不自持入泥復墜溷託體離本枝盛年  
有代謝榮華無久期卽此悟物化世俗空相嗤

北邙行

驅車上北邙客心多不樂松柏何蒼蒼白楊何蕭蕭斷  
碑荒碣無人讀剩與空亭牛礪角春風吹出古時愁曾  
見丁丁百夫築狐狸戴月來相窺紙錢繞地飛寒灰精  
靈往往嘯風雨白晝慘淡生蒿萊末路英雄淚瀾瀾萬  
事何人解辦此酒香沁土魂有知始悔從前不醉死吁  
嗟此曲勿復陳欲竟此曲多悲辛黃金如山惜不得可  
憐難買當時春君不見鏡中霧草頭露丸轉蜚螂何足  
數

短歌



金尊玉斝羅高堂繁絃急管明兩箱吳姬越女爲君壽  
君何不飲心旌皇旌皇不飲愁思多四座勿喧聽我歌  
陰山舞雪冰嵯峨大魚跋浪揚洪波行路難將若何  
拔劍斷流水流水斷續東西流丈夫處世苦嘆嗒何不  
秉燭酣清游悠悠千載若同調下馬桓王墓前弔拂衣  
出門當向誰明月直照黃金臺磨劍十年爲誰死我亦  
人閒報恩子

低頭苦咏如秋蟲爛醉頗有賢豪風忽然徹箸起歎息  
太行突兀盤心胃歲行暮矣風刁騷搔首但見明星高

腰閒白羽棄不用可憐摧折同秋蒿時乎時乎會相識  
牖下何如裹馬革

北風刺面馬不前短衣骭冷荒江邊當時甯戚困飯牛  
時平誰識王孫賢長才一世果何用駑馬轅車成一慟  
拏雲心事人不知枌榆燕雀徒相嗤

種樹須種松柏枝結交須結屠沽兒松柏美蔭自千載  
屠沽報仇知爲誰緩急叩門亦時有指困解衣終不負  
君不見信陵結士得士力朱亥侯嬴報其德晉鄙汗椎  
王失色



昨者出郭門酸風射眸子向北一直視萬古滔滔若流水左右何崔巍古墓一一盤蒼落石馬卧雨翁仲嘯對此使我心膽摧吞聲躑躅不敢哀

六鼇不可釣三山竟安在浮雲蔽日月墮淵何不乘流向滄海童船一去何時回三千射士曷不來蓬萊之山不可接至今惟有金銀臺噫吁噉漆燈冷射魚膏光祖龍老死驪山旁

### 五湖

一櫂好歸去五湖秋正淡蓴鱸初入市橘柚自成林散

髮不知處冥鴻無可尋迢迢煙水闊申旦起長吟

### 聽琴寄秋心閣

萬花無語爲春愁抱得瑤琴上小樓彈到斷鴻剛入破又添一種在心頭

### 古寺

林迴見飛鶴一徑水雲寬日影度谿瘦霜痕入樹寒僧閒山寺靜野老葉聲殘日暮不歸去灘頭弄釣竿

### 春雨二首

夕陽西下漸黃昏細雨霏霏穩漲痕花柳三春方倚眼

雲山六代易銷魂寒生斗帳龍涎霧愁絕江城烏夜邨  
淡巷有人嗔薄暮梨花淡處不開門  
輕陰不斷鎮蕭蕭野渡何人問板橋虛閣有誰延夜月  
空江應自長春潮蘼蕪草冷回香夢錦瑟絃濡咽玉簫  
倚徧闌干倍惆悵斷魂千里亦無聊

初夏園居

池魚無巨鱗籠鳥鮮健翮物情尙如此況子眷泉石嬾  
性厭塵喧蕤名喜地僻悠然卧邱園於焉樂晨夕心曠  
孤雲飛神靜清流激疏林露花紅虛嵐吐煙碧流連文

史閒偃仰日安適浮名何足榮勞勞洵非策遠參曲蠖  
旨終寄冥鴻跡寂寞掩柴荆與世日相隔

同一兄

徵蔚

對月寄丁若士

履恒

陸祁生

繼輅

娟娟秋月樓頭黃一隙冷射前林光兩人言愁意不愜  
舉杯忽忽傾千觴醉中謔語嫦娥驚擘笛滾作蒼龍聲  
繁華過眼如風鐙下視俗士皆蒼蠅淚亦不必落愁亦  
不足道醉鄉兀兀可忘年富貴何須置身早玉堂高崔  
巍何如手中杯劉伶阮籍差足齒俯仰餘子俱凡才狂  
語不止秋月殘若有人兮聲珊珊側聞玉女生長歎海



外幾樹紅珊瑚可惜顛顛哀秋蘭吾有拜母交雅數丁  
與陸丁生出語泣鬼神陸郎下筆掃塵俗同是秋風失  
意人聞言應更吞聲哭哭聲一停倒一觥死後空有干  
秋名不然好向五湖去散髮扁舟不知處否亦竟作汗  
漫游畫樓日日藏瓊鉤安能行歎復坐愁殘月墮海蒼  
天高曉鴉喔喔離其巢與君且復傾醇醪

聞歌

舊日聞歌處高樓細雨中江南春草綠緘恨寄東風

秋心閣題壁

一枕瓊花夢覺初到來籠鳥亦生疏背人獨向梅花問  
前事分明記得無

倚闌

木葉下汀洲蕭蕭逐水流江城三月雨塞雁一聲秋落  
合澗逾碧竹淡樓更幽倚闌無限意洗馬最工愁

雜懷

夢醒才知一著差黃梁枕底閱繁華百年何物能愁我  
萬事隨緣便是家漸泯機心某後劫尙餘色相水中花  
道人習靜年來久聽慣蜂喧與蝶譁



言言身卷一  
狼虎叢中掉臂行，巉巖險處一身輕。  
倦眸漸漸瞳人死，敲枕時時髀肉生。  
老大英雄思末路，風波世俗得浮名。  
乾坤誤我終何補，禿筆如山又築城。

竹牀清穩倚高槐，槐下野花零亂開。  
矮屋牆低支睡久，故窗紙破約風來。  
世閒兩耳無箏笛，月下三人舉酒杯。  
昨過吳王舊宮殿，綺羅何況早成灰。

數卷楞嚴伴病身，城南俠迹半成陳。  
謝他紫燕多情意，愧爾青山作主賓。  
瑟斷知音弦膠柱，硯疏問字匣凝塵。  
梅花一樹童年種，漸漸推排作故人。

秋懷六首

我心何鬱鬱，素節嬰商秋。  
西風滿枯枝，飛葉回高樓。  
靜中一搔首，怯此雙丸遒。  
海水不西瀉，倒入銀潢流。  
道長苦志短，安得乘槎浮。  
相思結成石，淚落不可收。  
黃姑旣我棄，去去且回舟。

秋燕鳴何悲，欲畱苦無計。  
朝入建章宮，暮宿五侯第。  
烏衣舊門巷，蛛網一朝閉。  
叢竹翳綠窗，孤華暈紅砌。  
彈指十年中，飛飛幾畱睇。  
沈吟對夕陽，雙淚不能涕。  
海水多悲風行矣，若爲濟春社。  
繁花開拂梁，待汝憩。

暮山數楓紫當秋發華采春風麗萬花忽忽不相待遇  
時矜幽姿過時迹安在陰陽苦代嬗繁華亦已殆不見  
衰草閒陰陰候蟲改花飛零作泥雨落不入海韜晦始  
寡尤無貽後時悔

蟋蟀入我牀夜夜作秋聲夜長夢更短時復一室行啓  
明竊月光乃復樓頭橫西鄰有弱女素手弄銀箏良夜  
不知愁聲聲愴我情揮淚溼衰草誰鑿予中誠我欲飛  
八月乞藥求長生思之不可得攬鏡幾回驚

秋風爾何來吹我檐前柳明月又相笑清輝入窗牖掬  
之已在地攬之不入手問子亦何爲思寄同心友凌霄  
抱貞木厚意良不負無謂相見疏道遠意自久秋至氣  
肅穆空房若爲守

脫我頭上巾獨釣秋江濱心空自萬古屋老無四隣得  
魚亦不賣醉掇湘湖蕪有時卧綠莎花影蔭一身浮雲  
蔽明月夢裏不知春所苦秋雨多一夜沒前津蓑笠暮  
江畔闊處重垂綸

題王太常雜畫冊十二首

攤書就花陰不識花閒路蝴蝶舞春風前邨日將暮



停琴佇涼月落落有清風疑入衆香國荷花一頃紅  
紅霞堆半山溼霧欲蒸雨無人肯尋花黃鸝蹋枝語  
古意入落蘚老木秋逾好何處著茅亭吾欲此閒老  
徑僂攜漁具沿谿覓釣磯竿頭新餌好與爾未忘機  
書聲滿巖谷澗斷白雲封欲識幽人宅門前山幾重  
梧影搖空碧唬蛩咽黯廊秋心無著處涼月在西堂  
雲岫排如簪巖花大於掌平生五嶽懷定著屐幾兩  
雲過山頭斷風迴雨腳斜采薪誰氏子戴笠未還家  
昨接山人書知來醉秋月倚杖候柴門呼童掃落葉

雨痕不沒日雲意澹如無惆悵前谿水年年長綠蕪  
徑憑蘿影遮壁仗藤花隔中有古先生著書忘歲月

回首

回首紅樓淚溼衣笛牀箏柱事全非桐花院落春無主  
又見東風柳絮飛

約二兄看菊兼寄大兄

莘京師

重陽節近秋花黃疏籬得雨生微香闌干當日記手植  
花枝長過闌干旁繞廊一日行百回闌干盡處傾千杯  
有時醉倒花底眠夢魂出入花枝閒吾家阿兄雅愛此



淋漓大笑不能止亟須攜酒慰花魂何苦寒樓檢羣史  
痛飲已見斜陽斜擲冠仰視喧歸鴉歸鴉求巢飛不息  
有客饑驅遠離別塵沙撲面車輪喧辜負名花好顏色  
人生行樂良非癡何爲南北東西馳死後之名吾不識  
但願日日飲卽得富貴於身更何補墓還作田田作土  
有酒不到劉伶墳何如一一生前傾只餘一事悲可憐  
近日囊空無酒錢雖然囊空無酒錢忍飢兀坐枯枝邊  
絕勝聽鼓明光前作詩告君君歸來猶及同看銅坑梅  
兩生行送二兄至揚

一生住南樓一生住北頭兩生日夜無所爲興酣拍手  
雙淚流敲門聲恨恨知子來相望呼童開門卽閉門恐  
有俗客窺吾堂登梯閣閣子不知拍肩大呼神爲癡一  
日不見心煩沖宵來飛夢還相同子不思我不如燕我  
若思子應如鴻兩生對語陽春溫兩生何事不出門出  
門一步卽荆棘瞪日向客客不識豈惟俗士嗔狂名比  
來親串交相輕一生忍飢但堅卧一生典衣思遠行一  
生欲行一生哭可惜南樓剩閒屋低回欲語黯無言更  
少瘦丁若與癯陸祁一生大笑轟如雷別後寄書日百

回莫言江口鯉魚少沿關時數淮船來從此樓中只一  
生含愁日借清樽傾醉中揮淚遙相思梁閒燕子能知  
之

月夜寄秦淮

明月又團團泠泠白露寒愁人正無寐不敢倚闌干昨  
夢度秋水高樓掩淚看傳言與新雁何日接清歡

棲霞寺

曲徑亂泉咽空山一鳥嘯遙聞清磬出隔在暮林西松  
雨秋聲古梁雲煥翠迷何當辭世網來此卜幽棲

山塘晤王仲瞿

曇

相逢時復撫闌干細雨茫茫夜月寒河海十年同濩落  
星霜一劔雜悲歡才名早已推孫楚俠骨何堪擬謝安  
爲爾低回三太息故人歌哭本無端

西山道中

朝尋南峰寺暮憩支遁菴心似孤鹿馴遁跡秋山南支  
公去千載貝葉畱空函寒蘿作淡翠古寺秋心覃靜夜  
氣肅穆新月煙中含微茫識林影飄渺歸魚灘持此謝  
人世煙霞吾久諳



山外孤僧歸一徑，蹋殘葉荒邨。禮數多見客，亦拱揖導。  
我入前谷，秀翠侵石骨，崖空闕綠。落蝙蝠靜如貼，幽草  
時含花飛墜。兩黃蝶長鑱，殊未攜茯苓，已堪掘夜色。忽  
上衣疏林，出黃月。

雲際一峰青，煙中鳥相語。澗寒濺石梁，滴殘夜來雨。秋  
風一何厲，黃葉落如許。斗絕路幽峭，閒田棄無數。松鼠  
欲窺人，竄入竹深處。寥寥梅花開，奇絕更何似。他時攜  
樵青，最好此閒住。  
時胡香海有卜居西山之約  
斜日澹平楚，縷縷炊煙橫。林梢出檐角，蘿徑聞紡聲。鳥

飢識歲儉，啄碎清塘萍。嗟此一陂水，足灌數萬杭。何爲  
廢濬浚，坐令旱澇更。緬懷城南田，稂莠亦已盈。明朝買  
犁鉏，徑儼歸躬耕。

避暑楞伽寺

松風涼入耳，客意在深林。古寺不知暑，閒來生道心。支  
頤聽清楚，叉手對高岑。余亦尋幽者，何時遂向禽。

登吳山絕頂放歌

秋氣殊復佳，合訪秋山去。可惜秋城無一人，解蹋秋山  
最淡處。獨攜等身材，吟上吳山顛。萬樹森似薺湖流，環



其前拍手忽大笑五湖落吾手有時白雲墮佐此一尊  
酒有時脫巾行林中蹴起萬鶴飛如鴻有時怒吼山神  
驚霹靂四舞狂蛟鳴狂生之狂無不有卻憶夫差滯花  
酒西施當日嬌春風笙歌聲沸愁蒼穹吳宮歌舞有時  
歇依舊湖痕漾晴碧湖心萬點夕陽紅中有臣胥眼中  
血興來直欲凌虛行仰叩閭闔排紫清窮奇眴眩目雙  
合大瞋無處容狂生翻身躍入馮夷宮便思跨鯨乘長  
風謫仙捉月竟安在塵世何人堪晤對不如飲酒且快  
意弄鳳騎凰恣遊戲雙旌前擁印高縣如此胸襟定奴

隸我竟是語心骨悲悵然欲訴知者誰停觴不語三太  
息惟見吳山一輪月

酒醒夜起

酒醒倦成寐空庭已夜分寒螢不依草孤月欲歸雲隔  
竹呼茶至遙山清磬聞十年疏曠久此夕遠塵氛

聽琴

露影一庭白琴聲清未闌秋風弦上緊冷月夜窗寒古  
意不悅耳今人誰與彈余懷在山水流響已漫漫

浩歌

白露團繁霜衆草慘不綠我有顛顛歌聽之亂心曲卞  
氏泣獻楚季子悲入秦當饗盡三歎魚目可混真今夕  
何夕銀河清新月已透東軒楹宿昔一斗酒不如爲子  
傾古來賢達竟安在惟有醉客長畱名停杯不飲愁復  
愁拔劍斫地雙淚流男兒跼蹐不稱意會須挂席浮滄  
洲

送友

少歲偏多故誰能柰此何才原一代少愁覺百年多白  
日閒中靜青春客裏過棲鳥殊未穩中夜繞庭柯

畫鷹歌同二兄作

一鷹振翮摩蒼天一鷹突立荒江邊陰風慘澹颯素紙  
令我仰視心茫然憶昔含愁向原野滿目淒涼淚如瀉  
草閒狐兔勢憑陵不見飢鷹破空下凭闌對此心爲歡  
血毛滾作寒煙團妖狐就縛狡兔死一時四野愁雲寬  
俗眼棄置常模糊世閒神俊無時無中宵嗚咽畜勁氣  
折翅斷羽悲窮途可憐顛顛依荆棘欲擊奸回惜無力  
一旦英姿忽解縲縱橫千里尤橫絕噫吁嘻安得數輩  
從沙磧狐兔雖多終絕迹捲圖捲圖三太息



答陳古華

廷慶

太守書後憶白門事

年來歌哭總無端  
眼底誰憐范叔寒  
明月斷鴻彈絕續  
亂山匹馬話辛酸  
狂談四座停杯聽  
得句三更拍案看  
此日傷離愁轉甚  
草箋且與報平安

寄張子白

若采

黔中

雁飛不到萬山西  
遠夢尋君路半迷  
官閣陰詩峰影峭  
城樓吹角陣雲低  
時平害馬多長策  
日落看鷗盡意噓  
聽說賈生最年少  
政聲早與次君齊

寄陸紹聞

耀通

荊州

關河顛顛雁鳴邊  
落葉聲中憶別筵  
遠道尺書千里怨  
當時寸意兩情堅  
浮湘從古推名士  
作客憐君最少年  
莫更傷離兼惜別  
計程須及早春天

同洪北江

亮吉

太史暨陸祁生小集卽送祁生歸

里

木葉乍脫寒山秋  
風吹涼葉入我樓  
我時枕書正兀睡  
感此使我心含愁  
含愁十日不出戶  
是誰打門驚夢破  
斜披衣裳倒著冠  
呀然一笑天地寬  
君從何方來  
飄挂錢唐雨  
夢向稽山最上頭  
飛魂遙睇疑逢子  
翰林仙人

本謫仙抽簪雅復來林泉爲公沽酒公毋阻質裘應值  
錢三千我昨悲秋且莫道太息無如飲酒好萬言不救  
一朝飢博得榮名等秋草此時大醉笑仰天笑聲上徹  
銀河邊碧天萬里淨如拭赤足徑蹋蓬萊顛樺燭輝輝  
月光午君起言別我心苦攬衣爲我且少畱漏轉更闌  
絕街鼓君不見人生聚散非草草一夜相思令人老

松陵道中

細雨滴萍碎有時還夕陽水痕多綠淨秋意劇蒼涼竹  
老人家古霜殘稻種黃荒邨好風日洵美是吾鄉

寒山寺

一磬敲殘雨寒山山寺淡梵聲清入耳鳥影倦依林跂  
足且高卧冥鴻知此心他時問煙水誰道是幽尋

雜懷

被酒登高臺蕭條歲行暮積波清淺流昨過已成路少  
年不行樂恐爲歲華誤不見冢中花淒淒泣繁露喟然  
望白雲蒼蒼鬱層霧

拂衣出門去芙蓉怨霜早驅車上古原中見江南道吾  
欲問秋蘭開遲爲誰好靈均不相待寂寞同秋草含愁



已無言憂心忽如擣

我挾雙行淚思寄花閒樓西風意飄忽蘭蕙已先秋  
援琴絕續彈娟娟素月流哀音入寥廓揮涕驚牽牛絃繁  
柱復促獨自唸清謳傷心不如意日暮空江頭毋爲久  
鬱鬱胡不期蹇修瀉水置平地南北東西流

三萬六千日日日須揮觴醉挾屠沽兒醒擁邯鄲倡傾  
心許肝膽意氣胡慨慷唸君報仇行策馬上層岡黃金  
遂蓬散盟言捐道旁交情管與鮑千古未參商

苦思行

獨漉獨漉水沒足欲行不行淚相續前驅猛虎後長蛇  
窮途困厄何爲家男兒出門當自雄天高野曠多悲風  
燕昭臺畔莽宿草英雄氣盡飢寒中仰天大笑出復入  
躍馬欲行行不得吳鉤鹿盧除不祥時無知者空自傷  
短衣覆體復貧賤日短夜長歲行宴擲杯不飲心起瀾  
爛爛明星淚如霰噫吁嘻古來壯士不相識短衣上馬  
思殺賊

得丁若士書

書來經半載辛苦說相思細雨孤燈夜空山落葉時秋

心新減酒春影舊唵詩各有窮途淚頭顱事可知

題南田畫

孤林靜如春嵐氣含青煙鳴榔出前浦漁燈涼遠天

吳偏將軍周瑜手植栢歌

策馬尋秋入古寺亂蹋積雲影顛顛殿角飈撼摩蒼龍  
人言此是將軍樹一枝怒攫秋天雲根穿腹破含精靈  
一枝倒卷落敗瓦真氣黯與山容青我來卻憶前朝史  
依稀能說孫郎事將軍橫戈方少年漢家陵闕成飛煙  
蒼茫指盡英雄髮劫火燒殘半壁天奇才天下爭生死

子布諸人腐鼠耳等閒天意換三分王濬樓船去何駛  
大樹蒼蒼閱陵廟降颿夜走長江道此日將軍憤未平  
英風憂擊聲疑嘯丞相祠前惜未經成敗從古原難明  
寒潮銷盡傷心淚失計荊州一角城

滌塵齋落成三首

室小纔盈笏安牀養道心窗虛秋意老徑曲夕陽淡近  
市客非隱拋書人偶唵飛飛一黃蜨戀殺是寒林  
病骨當秋健經旬未賣文畱蔬供客饌種菊課童分倚  
嘯或逢月停杯一看雲晏安雖敗志機事不相聞



吾生亦知止於此息勞肩琴罷月剛午  
碁殘日似年孤龍吼落壁獨鶴破秋煙  
身世升沈感茫茫且信天

書堂獨坐

世夢徒爭鹿名心類祝雞果緣衣袂落花礙帽簷低長  
日只敲枕有時還杖藜終南聞捷徑何必買山棲

醉中示客

君不見園中花昨日明豔嬌春霞今日零落委泥沙又  
不見西鄰姬十五十六生光輝三十四成雞皮古來  
萬事多若此富貴堂凹一杯水下士聞言笑且驚有似

東風射馬耳淮陰市上辱少年道家忍垢真可憐一朝  
假王車馬騰少年百叩百不應蘇秦身佩六國印親戚  
郊迎膝前進丈夫變化本無常俗眼模糊或能認窮通  
流坎皆偶然醉鄉毀譽來無端有口何如且飲酒世事  
悠悠反覆手

擬謝元暉酬王晉安體寄姚春木

椿

京師

陽曜沒西嶺陰魄升東屏荒塗委百草蕭蕭繁霜零閒  
房多悲風哀此孤鴻聲無爲稻梁謀慎爾緇素情勁松  
勵後凋幽蘭耀秋榮夢遠魂苦勞月落參已橫非君擢

莖葉持底托微誠

題萬廉山

承紀

大令琵琶行後

絕代離騷怨思多芙蓉其柰夕陽何秋來休更添顛顛  
悽斷銀河一寸波

飄零蹤跡定何年只是柔情已化煙莫更曲終彈落雁  
江南愁在早秋天

唱出天涯恨未平春鶯秋月夢分明關心萍梗渾無準  
風裏楊花定一生

花心一點上高樓譜就人間萬種愁我有淚痕無著處

化爲秋雨入潮流

相逢何必定相憐石火光中未了緣洞口桃花人一世  
潯陽舊夢已多年

雜詩

啟明何歷歷鑒此明月光千蛩訴遙夜衆木未經霜佳  
人理清瑟絃短意胡長一彈燕北飛再彈鴻南翔裴回  
望銀漢中道不可杭盈盈遠一水脈脈嗚千行落花不  
上枝盛年處空房

飄風一胡厲吹我西南來白草滿空山清露凋塵埃此



閒非故鄉洵美不可懷逝將返舊山悠悠我心悲

中庭有蘭杜所思在遠道惜哉日將暮采之不盈抱生  
無百年固若華易枯槁君子有逝心棄我一何早努力  
據要津榮名可長保離離堦前花鬱鬱墓門草持此涕  
淚多隱憂令人老

去日正苦多來日當大難問君亦何爲空房發長歎沈  
憂不覺曉長夜何漫漫拔劍出門去怯此千層瀾對案  
不敢食何況加晨餐始知烈士志未肯懷苟安

側身向西望遙愁忽然至不有盛衰故胡爲久棄置新  
人與故人君心自生異昨織綺一端臨風遠相寄四角  
盤雙龍是君舊時意搔首重峙踞夜長靜多悻

荆氏有良璞楚國竟遭別燕王求死士千金市駿骨秋  
草翳高臺英雄壯心歇腰閒雙鹿盧紫光欲蝕月寶之  
經十年斫石適摧折所用苟失宜不如一頑鐵欲棄亦  
何忍未言已先噎

我有同心人遠在青雲端寄書日百回何如握手歡秋  
山鬱蘭草常恐當歲寒竹枝何嫋嫋鯉魚不上竿樓頭  
新雁過怯此鳴聲酸知君復胡似努力期加餐所貴崇

令德因之發長歎

燕子磯題壁

倚檻平臨一笑輕勞生久欲悟浮生自應到此回頭早  
大好縣厓撒手行六代雲山畱燕語一江風浪證鷗盟  
游人讀盡殘碑碣猶說當年北固兵

老衲低頭眼不擡似應笑我戀塵埃滄波弄影涵空闊  
石壁畱詩待翦裁古葉經霜凝砌厚野花無主繞壇開  
日斜負手蒼茫裏指點寒雲澀綠苔

飲武定橋酒樓醉中作

渴羌擬借西江傾酒錢無著沿街行諸子約我市樓去  
新雨洗出天容青我時殘夢正初醒就裏凭闌問秋影  
飄然波底縣青光月色如鬪斜陽黃醉中大笑顛如雷  
散髮直欲凌瑤臺嫦娥若肯勸客飲醉死當盡三千盃  
一盃酌向月一盃持問天不然喚起李謫仙與我拍浮  
箕踞於此閒白雲迢迢不可招待來不來心煩勞遙情  
空際發高唱靈旂仿佛乘雲飄愁思圍天密無縫沁骨  
新涼誰與其笛聲吹滿六朝秋驚醒城南萬家夢  
曉過城西禪菴用昌黎集中山石韻



言言詩集卷一  
三  
梨花淡白春風微  
松鼠竄樹連  
蜷飛我來亂  
蹋積澗石  
昨宵雨過芹芽肥  
卻思去冬旱  
坼地大麥小  
麥抽苗稀  
野老望雨亦殊急  
一雨不救窮  
檐飢鈴聲導  
客過澗去  
晨鐘曉梵開  
禪扉講臺深  
敞日光煥  
坐久始見同  
雲霏  
儒生縱乏救時策  
量腰亦減先  
年圍催租傲  
吏虎而翼  
枵腹典盡妻孥衣  
西南況復用  
兵亟拭劍怒  
欲率金鞮  
上馬殺賊下  
草檄棄繻期  
我關前歸

南樓對雪復疊前韻

春寒得雪酒力微  
凍鴉抱粟城南  
飛舉盃欲飲  
二歎息

狐裘不煖羊羔肥  
前山滅翠枯樹折  
仄徑沒骭行人稀  
兒童隔巷語辛澀  
號寒且復時  
噉飢北風射人面  
如裂  
終朝不敢瞰柴扉  
斧冰作糜火難熬  
炊煙冷結寒雲霏  
北堂韻脚亦寒瘦  
尖叉險押詩城圍  
林盡又見隔浦凍  
舟子頸縮攤鶉衣  
如斯名利亦難事  
何爲久戀塵中鞿  
明朝披髮入山去  
遙指白雲深處歸

題桃源圖三疊前韻

神仙之說厥旨微  
眼明冷見桃花飛  
此中竟別有天地  
離離桃實垂枝肥  
羸顛劉蹶桃幾熟  
漁郎未入知者稀

巉巖峭壁畫塵世披圖令我忘朝飢桑麻長遍屋旁路  
雞犬遙認花前扉新雨中添綠波漲煥風旁勒紅霞霏  
昨宵夢入故園步桃花手種皆成圍此圖恍惚亦相似  
投簪何日披漁衣出山十載不快意世網牽束身成鞵  
掉頭俯仰苦局促故山如此胡不歸

游靈巖山館遇陳古華太守因並轡歸

春風撲面作酒濃爛醉徑入吳王宮雙雙舞蝶若前導  
馬蹏亂蹋飛花紅廢興閱遍閒亭閣多少淒涼怨猿鶴  
尙書當日讀書堂又見桃花鎮開落花前一笑花枝顛

馬上高揖黃金鞭昨者別去今復遇萬事毋乃皆由天  
日痕漸薄春衫輕客欲入城車馬停亂鴉萬隻蔽天黑  
戀此一朵山容青歸途月黯聽街鼓側帽哦詩身起舞  
醉呵候尉遙啓門如此游山亦千古

歸後同陳古華太守談別後事乃復至曉

自別山靈歸魂飛苦難鞚漏柝沈沈已三更劇喜談淡  
不成夢銀牀轆轤怨金井如波恨事迴方寸君因春影  
憶孤花我恐秋霜生兩鬢滿堂紅燭何輝輝月痕一點  
檐前來君何不飲長戚戚拚將心事歸金鬯男兒底爲



錢刀愁黃金散盡何須憂

時余有寓園之累古華近事亦然

君看漂泊

飯漂母常人豈識王孫侯辛苦風塵不如意拔劍筵前  
爲君起霜雪難磨作棟材途窮總帶凌雲氣多君乃不  
憎酒狂傾心許我何激昂一言不合大吏意手拋金印  
歸山莊丈夫處世有屈伸不見落花舞古春提壺自樂  
子規怨桃李詎與春風親塵栖弱草須臾事各著千秋  
落青史竟使蒼生望雨霖何妨垂釣看秋水明星歷亂  
風刁騷鳴雞喔喔東方高坐中拍手可長嘯驚醒萬樹  
鴉離巢迴頭重望昨游處溼霧四山欲蒸雨狂風一夜

萬花盡剩與黃鸝背人語勝游尙復不易得對此何須

更嗚咽

洞庭東山碧螺峰下有泉甚清徹孫副戎名曰拜

泉分寄一甌勻而味之足與惠山相上下詩以

紀焉慨此水之遭也

米顛拜石今拜泉將軍毋乃人中賢按圖不入陸羽譜  
一泓瀉出蒼涼天洞庭之山百餘里落木秋深萬鱗起  
茲山秀絕勝他山約束精靈歸勺水中浮僊草不數莖  
泉古恐帶龍涎腥洞中老蛟蛻遺骨夜半幽嘯聞空冥

孫君知我有水癖分供書堂鬪標格山僧適餉碧螺春  
自候銀餅詠清絕九龍山下幾經過跳珠散沫如擲梭  
神靈一夜走空綠影入金庭不作波

青荃詩集卷一終

青荃詩集卷二

長洲蔣夔希甫

茗谿行

湖州財賦甲天下作宦視此成利途柔茹剛吐亦常理  
利之所在人爭趨强者乃至僅如額升斗不肯飽吏胥  
吏愁官怒云犯法官符四出喧里閭兩強不下遂相抗  
紛紛保聚爲身圖吁嗟此特畏鞭扑若云倡亂烏可誣  
昨者急傳發兵令桓桓方伯躬前驅霜矛耀日光照地  
浴鐵滿路聲相呼衆官聞此大歡笑爲樹有蠹須爬梳



不然民氣驕已極其勢漸欲行三吳嗚呼民命實至重  
豈可以此爲嘉謨况乎兵者乃凶器首則有罪餘何辜  
片紙曉諭自立解何至竟煩卒與徒到而不用則生玩  
他年何以懲荏蒲設竟屯聚是激變又難一一馘與俘  
黠者竄逸愚者戮累及童稚兼婦姑顛崖墜谷事不免  
弊有必至非抑掄嗚呼官亦何可縱後此慮遂成市屠  
擇肥而噬昔所歎知而導之胡爲乎去冬武邑有似此  
紛傳樹柵并張弧有客扁舟往撫視萬衆額手爭前扶  
夜宿其境寂無咳今年戶戶輸新租人傳此舉特天幸

古稱忠信豚魚孚事經喜事一點染繪聲繪影非其初  
或加附和或貢諛有識箝口徒長吁方今

聖人初卽位

詔求民瘼寬新逋赫然震怒究底裏公等安得長晏如  
嗚呼用法謹之始官民慎勿分榮枯誰能喚醒當局夢  
以吾此作

丹墀鋪

感事

爲治雖尙嚴然須平其氣要知官與民一理無二致官

民苟隔絕紛然鬪才智世無真是非誰能辨其事傷哉  
一朝忿成此騎虎勢

讀書慕聖賢臨事忽顛倒究其所以然偏惡與偏好次  
者患得失爵祿圖自保又其次迎合上上冀書考巧宦  
有至拙殺人遂如草

送佑之

慶保姪還里

堂前大母髮飄蕭送汝還家慰寂寥萬事總輸歸去好  
此生強半客中消也知欲別情無奈若果相思路不遙  
料得征帆纔卸罷便應團坐話今朝

題某少尹送別圖

指點歸裝一葉輕臨行爭說長官清果然官好民情好  
畫裏如聞歎息聲

下僚最易知民隱縱使能清也要才百首新詩幾行淚  
精神多少換將來

有感示友

學道日已久恩怨日已忘不作子孫計况爲名利忙一  
片光明心直欲游羲皇昨者別君歸中夜三徬徨君本  
世家子器局殊軒昂勁骨傲霜雪俠氣摩穹蒼黃金隨



言言集卷二  
三  
手散一官來古杭同官不相識疎嬾由吾常路聞人說  
君始一登君堂款戶君不應楞然偃空廊起揖未及竟  
語急難具詳請看釜生塵知乏茶與湯欲出訴友朋倒  
篋無完裳前尙糴斗米半月貲未償今早脫吾帽持之  
換秕糠賃主又索租譙責聲琅琅久假竟不歸謂官太  
彊梁吾聞起而歎君意引愈長重言有老妻痰塞病在  
牀昨夜號北風人病心益慌重衾在質庫敝袴形不藏  
四肢學蠶縮粟起一一僵憶昨初宦游裘馬都輝煌親  
朋爲作官排日華筵張隣里爲作官賀者填門墻家人

爲作官欣然治行裝一寒竟至此何顏歸故鄉爲官盡  
言樂官味吾已嘗不如賣菜翁鼓腹嬉衢康不如應門  
卒終歲飮酒漿聽君言未畢吾起循東廂登車竟歸來  
搔首爲籌量昔聞魯子敬指困資周郎又聞白太傅大  
被蓋洛陽世亦多大賢任卹曾傾囊况乎盛王政鰥寡  
相扶匡至今孤獨氓日耗天家倉何至一命士而使溝  
壑亡吾試呼將伯論理決可望躊躇候雞鳴起視明月  
光升堂謁大吏哆口談虞唐左手挾柔翰右手弄金章  
侍史何白皙蜀錦裁襦褙鼻息吹虹霓僚屬爭趨蹌瑟

縮不敢言退向同官商豈無慕義士力薄難支撐閒亦  
有豪者口應心否臧是日正舉宴鏘然鳴笙簧堂上何  
所有娥娥邯鄲倡厨中何所有霍霍宰牛羊飢坐盡珍  
錯隔席排餽饑止吾姑勿言且進此一觴吾乃大沮喪  
惕惕中心傷需次十八載不得官一方去冬鬻衣服今  
夏質田莊倘非太守憐謂棣華秋坪  
雲巢諸公旦夕無餼糧高堂  
有白髮何日能迎將公然詡吏隱其實乖中腸無暇爲  
君計自顧悲未央焚香默祝天庶幾離官場

怡綠莊初成喜而有作

百頃琉璃在眼前家居似此亦安便已聞蔬筍從來賤  
更占魚鰕一味鮮點綴山林須得地乘除官職且由天  
只愁風景無邊好誰寄成都十樣牋  
低低板屋放書箱恰恰朝東可佛堂伴我瀟閒是修竹  
分他內外有花牆商量圖史娛賓地斟酌春秋鬪酒場  
閣上大明樓底暗不知何處好安牀  
此莊最好算樓中曲折安窗面面空春老日迷千樹綠  
冬晴背曝一檐紅盈襟婉婉秋宵月滿榻涼涼夏日風  
爲謝湖光與嵐翠四時裝點十分工



儻容此地老潛夫弄水看山興不孤退步近知閒處好  
抽身肯待異時無煙雲準擬詩千首花月平分酒一壺  
我與逋仙判通介攜妻挈子住西湖

示佑之姪

爲文亦無難下筆忌攪擾然須積之厚大拙出奇巧穉  
松失灌溉憔悴不如草鳳皇戀稻梁參養同凡鳥無取  
衆目悅要在寸心造汝性何拳拳汝筆亦矯矯譬諸尺  
寸綾所苦邊幅小又復慕速成讀書欠探討義精始博  
大思苦入窅渺一旦豁然通虛空任顛倒古人吾不知

俗學庶一掃慎毋如汝叔但小時了了

王獅巖楨過訪卽題其絜華樓詩集後

我生有癩癖不喜見生客近來益善忘越宿了不識見  
客雖刺刺其實兩不卽有時廢送迎有時倒巾櫛有時  
忘主賓有時挾書冊坐久聲忽軀起舞肩還拍狂名噪  
人口軒車遂絕迹其弊欲矯之壘塊塞胸臆君嘗一過  
我對面雲霧隔君亦淡蕩人疏密意俱適偶與談至理  
創若有新獲試作大小叩汗漫海難測我乃瞿然驚相  
視成莫逆倘非片語投幾不悔疇昔因此大歡樂興到

便命屐縱論至于詩謂我能辨晰示我詩一編斬新出  
標格如游蓬萊山樓臺絢金碧如窺河伯宮魚龍互出  
沒爽如噉哀梨清如撼長笛曲如蟻穿珠貫如蝨中的  
雄如猊爪深滑如鶯舌歇險如渴驥奔健如盤雕擊艷  
或如掠鬢莊或如搢笏如桶脫底輕如箭離弦激如珪  
璋琥璜如杞梓松栢薜荔學山鬼冰雪眩姑射千年土  
花紫萬里月華白晴絲一縷裏碎錦百番襲美人來鏡  
中寒梅倚籬側迎陵引仙音曇華見佛國嶧陽桐半枯  
太華峯獨擘融融春初晴黯黯秋將夕馥馥旃檀香洵

洵浪濤齧落落小山曲莽莽大荒磧淒咽聞啼蛩蒼涼  
聽鳴鴟寒鷗乍款乃疏雨忽點滴紛紜諸變態一一呈  
翰墨展卷未及半咄咄勢已逼何爲當吾生頓有此勁  
敵得非飛仙人借此相惶惑挑鐙重細讀踪跡一詮釋  
讀書三十年公卿盡側席名山與大川客車所親歷紀  
游何縹渺詠物亦雕刻感舊見交誼轉漕念民力河決  
論激昂哭弟志愴惻凡此至性情頗足快肝膈况復簡  
鍊師點墨寸金惜想當脫稿時一字一搜剔唯其包者  
宏故其取之擇某也瞠乎後自愧無能役歎息識君遲



恨我雙目窄欲鑄此大錯鐵向六州覓作詩當懺悔甘  
受飛瓊百我詩苦奔放峻坂不容勒從公乞眞言瑤臺  
餐金屑軒軒若霞舉蛻此輓近骨肺腑沁喜清蹊徑曲  
能涉組練縱精銳紀律訓尤急君其堅壁壘吾將乘君  
隙一旦遇平原空中鏘承鏘君聞一軒渠斯事殊逼仄  
他日有客來敬之吉終得

移居

草草移家不當家也須插槿補籬笆墻陰一角閒無用  
爲種梅花種菊花

淨埽階前一片落疎闌曲檻略安排有風有月此閒坐  
無客無花漫舉杯  
亂石如何當假山呼童移放竹中間隔籬拗斷一枝筍  
笑指小兒比我頑  
偶然點筆喜窗明茗盃香鑪次第橫可惜宵淡好涼月  
無人來聽讀書聲

與王渠生

同治

弈戲作

雨窗枯坐愁迢迢兩人倦語嫌無聊胸中甲兵忽隱起  
据案一笑分袁曹看君布算有深意一子欲下千回敲

長空斷續雁行遠月痕淡密梅梢交山從斷後出逋峭  
水當激處生波濤此時充國尙持重欲擊不擊增煩勞  
鴻溝劃守兩不下令嚴遮隔游軍抄交綏卽退若姑待  
摩壘而去愁相遭中原逐鹿事漸急魯柝已是聞邾郊  
吾謂指揮便大定對枰無語心忉忉忽然陣雲起東北  
黑霧滃欲山河包神龍掉尾意恟恍怒驥頓地聲咆哮  
陡將全局勢震動左甄右拒無堅牢令人神眩色然駭  
思游冥漠心旌搖上兵伐謀古所訓其意毋乃西南撓  
姑偃旗鼓示之暇項王果出單身挑縣門不發欲穿虎

布網益密將屠蛟誘之入隘兩鼠鬪短兵相接風刁騷  
戰酣奪得太史戟搏急斫斷孤延刀得臣憑軾想寓日  
子胥遭挾徒譏譏突圍愈猛勢愈困一擊正截常山腰  
峭陵乍見覆三帥泓水又報擒二毛倉皇懷壁閒道走  
巉巖絕谷逢礁嶢古稱天險一夫扼秦關畢竟懷王要  
豢吳端有操縱在竇入牛口安能逃至此勝負差可儼  
君猶志大言囂囂我乃潛師壓西境棧道先遣張良燒  
井陘倏忽樹赤幟泚水太息陳餘梟何須三駕始服楚  
一舉凱奏彤弓橐其餘邊隅諸竊踞夜郎雖大如螭螯



子重縱欲簡卒乘晨星厯落秋空高長城已壞投憤起  
殺氣隱隱浮眉梢攬衣止君此戲耳詰朝再見吾其饒  
夜坐  
宵長一任漏聲殘強欲攤書眼倦看未老已嫌燈燄小  
微寒彌戀酒杯寬人能閉戶差非俗詩要名家亦大難  
正自淒清誰慰我月痕淺白上闌干

示客

古人重親民縣令職庶幾近雖權稍輕而尙有可爲朝  
頒一條教暮己人傳知日斷一兩獄民已蒙其施風尙

有利便一切姑聽之民能信吾教徐起視所宜患在下  
車始才智逞臆私誇張赫赫名羣魚亂于池分毫無裨  
益集此衆口疵向後愈鑿杓乃至不可治請看循吏傳  
清淨真吾師閒與一摘發飈轉風車馳動靜兩不測庶  
杜胥吏窺

胥吏何能爲特恃官與親窺伺肘腋閒令公生喜嗔顏  
色一假借漸至不可馴矯之日鞭扑其患來無因絕弊  
益滋弊是謂重困民吾思聖人言大哉體羣臣旣欲用  
其力先須養其身衣食粗足給飢鷹自依人未犯法縱

寬有犯法必伸吾法不可撼讐伏驚如神

書生眼如豆動稱古時好非其自視卑卽由所見小政  
教至今日事事極分曉盍一按令甲章程非艸艸君自  
不讀律臨機失頭腦試看政卓卓全憑心了了事變倉  
猝來應之趁乎早平時欠講求至此總顛倒讀書不通  
今糟粕安足寶精心考成案斷獄自然老宜速不宜遲  
用拙莫用巧速則弊未生拙則力能保

未求百姓知先求上官諒否則舉措間動輒遭疑謗振  
飭云氣浮撫循謂癰養嗚呼縣令身百務所倚仗物物

求其全種種實無狀試觀當局公曾經幾懲創心膽一  
朝怯十年神不王只好樣胡盧何能慰民望事上在信  
友兼須衆交相事上以敬誠處友以退讓庶克濟吾事  
不負稱保障非比諸閒曹積然可自放

好事與畏事同一釀禍胎患在乏耳目處處生疑猜所  
以舉措間動與百姓乖究竟彼都士利害關胸懷十室  
有忠信吾以爲雉媒博采斷之理聾瞽皆奇才其閒桀  
驚者閭里推渠魁不能結以恩便當懾以威顛倒二者  
閒遊刃何恢恢設遇大興舉與夫水旱灾辦事要有人



豫此牙爪才太阿儻倒持弄爾如嬰孩

送王獅巖赴蘇州

風緊雪紛紛天寒雁叫羣今朝一尊酒何處再逢君半  
醉各揮手孤颿入亂雲綺窗梅發後莫惜遠相聞

書吳兼山嶰別駕近詩後

賢豪有坦途懦夫望難到水深乃激蕩山高定逋峭豈  
有鄉愿流妄思造堂奧我公來西湖空山鳳皇叫一時  
無賢愚公然盡含罩初者尹甌江山澁雜海嶠鞭絲豪  
猾讐削牘吏胥弔迴颿指鏡湖精心勤化導謂此民氣

悍先須弭桀驚撫綏追龔黃振頓慕產豹行政有猛寬  
易地則皆效近傳彼邑氓每食必先禱兩浙古大邦許  
控多命盜設局總其司大吏慎入告煩公佐庶獄片言  
判繚繞情理揣八面精神坐四照民命所出入肯爲勢  
枉撓在公人我忘而人嫌執拗有時排衆議干將忽出  
鞘突入三軍中迎風舞其纛豁焉曲直分安得任顛倒  
不見六年來獄底覆盆少公才何盤盤公志尤慥慥獨  
具淡蕩懷不改書生操得閒卽看山畫諾或坐嘯淵淵  
明察才一一好詩料當其下筆時有境靡不造摹寫風

雲思鑄鏤渾沌竅立意必斬新出語自奇妙孤花表幽  
鮮萬馬恣騰趨技精看飲羽力沈竟掀淖湜籍走且僵  
妥貼而排冝某也少失學于詩得稍稍惟詩可以興煌  
煌垂學校先王採民風是之謂則倣古今同此才何須  
尺寸較聖門取狂狷但當戒輕剽苟能截衆流便已撮  
大要舉世趨委靡和扁藥難療軟媚悅俗目知否古人  
誚倡言誰聽之違衆頭屢掉悠悠二十年狂名遂羣噪  
公獨知生平獎借現乎貌曰士貴立志伊人非簡傲今  
者讀公詩我心何好好政事與文章一貫無二數始知

性情真斷無鹵莽報嗚呼歎觀止千秋庶同調持此大  
聲呼喚醒羣愚覺誓將策駑足從公翼名教作詩敬告  
公公毋莞爾笑

雨霽納涼

雨腳纔收月未生流螢幾點閃新晴可憐縱有清輝在  
只効籬根艸際明

何日

不多憔悴不多狂且喜閒身世已忘天地有情容我嬾  
鶯花無恙笑人忙酒闌又欲留愁住書好徒煩引睡長



何日清涼山寺去眞供埽地與焚香

挽浦曉江 曙文

欲哭不成淚天乎如命何俸微嫌藥貴債重覺身多白  
日愁中老青山夢裏過一生餘底在似爾直蹉跎

送戴岷源

鳴臯

公子入都

世間竟有佳公子縱酒狂歌還讀史舌底瀾翻百疊波  
筆端旖旎千番綺與余相見卽相親兩心共指西湖水  
方今人才亦可哂半世沈蕤章句裏盡說蹉跎負此生  
那堪束縛酬知己倉卒圖全恨已遲講求無素嗟誰恃

局外從容上手難可憐我亦尋常士尙書曾受

先皇知亮節清風滿人耳君也趨庭得緒餘平生自信  
知何似觀書卓犖鏡呈形養氣精純劔繞指遇事都教  
翻覆看旁人那得粗豪視剪燭聽君汗漫談舌橋目眩  
吾心死落落天涯推數公此才于世今還幾昨者別我  
謁選去萬里看君脫繚始顧惜家聲莫近名平章國計  
先持體許身稷契古有之多少蒼生望君起一朝奮翮  
摩青天我自甘心百僚底

江行雜詩

不汎空江又幾時今朝一舸去尋詩無端句起煙波願  
笑撚綸竿問釣師

儘說浮家總未眞江神應笑苦吟身只消頂笠披簑去  
便是天隨隊裏人

船尾山搖一抹濃岸頭楓閃幾株紅先生帶得清游福  
隨意推篷恰沒風

一路青山不肯平數峯斜矗數峯橫此閒著箇蕭閒子  
定有詩情宛轉生

浪花如雪打前灘老柳疏槐戰曉寒說向城中人一笑

渠儂眼界者番寬

短短橋邊矮矮墻不成邨落不成莊是誰鋤菜歸來晚  
破帽籠頭趁夕陽

除夕自遣

作吏二十載更事亦旣多讀書四十載漸漸雙鬢皤精  
神坐銷鑠光景成謬譌去年待今年今年倏已過又盼  
明年來明年定如何老妻在旁笑君言何坎坷人生天  
地閒榮悴原殊科檢君篋中衣冬裘而夏羅佐君盤中  
餐肴核具則頗出門有車輿閉戶無風波君如欲看山



湖上峯嵯峨君如欲讀書插架資研摩欲弈亦有伴欲  
吟請高歌筆硯儘揮灑花竹供婆娑卽如今夜閒幾輩  
雙手搓補東復缺西日色看看矧聽此聲擾擾誰能舞  
傴僂惟君籠兩袖如坐安樂窩梅花環几案對之時一  
哦天何負于君而君色不和不如飲美酒一醉朱顏酡  
試將好身手憑此歲月磨吾聞爲憮然卿言理則那我  
實不知分尙欲誰譙訶含笑竟一瓊積然夢南柯忽驚  
爆竹聲驅走此睡魔神仙與將相夢裏還蹉跎

梅影和繼蓮龕

昌

方伯作

淡日初籠處士家垂垂幾樹已花花巡簷笑索分明在  
隔竹潛窺隱約差曉色烘如添向背暮雲合又失敲斜  
孤山儘有晴明路肯讓荒烟冷霧遮

映日

薄薄疏疏淡閒濃和烟和月任落封窗明冷蕊全鉤勒  
徑轉高柯忽疊重一段梨雲扶不起幾番縞袂記相逢  
素娥可是無聊賴寫出羅浮夢裏容

籠月

溪邊籬角乍逢時世外偏留絕代姿對鏡尙憐寒勒住  
凌波如訴託傳遲色香淡盡春原在環佩歸來月不知  
倩女似忘林下好離魂與照可相宜

臨水

又從銀燭借輝光  
月地雲階事渺茫  
數點白描宜紙帳  
一枝斜映落迴廊  
微吟有客仍官閣  
擁髻何人儻壽陽  
笑指膽餅春不遠  
今宵乞放十分長

倚鐙

冬日過怡綠莊散步至段橋而返得詩十二首

隨意閒行那用招  
不多幾步段家橋  
今朝天亦如娛客  
晴影射波時蕩搖

屋角梅花三兩枝  
數拳文石共參差  
配他修竹蕭疎甚  
只是清高不入時

眞箇全家住畫圖  
闌干一曲一西湖  
試來樹底看樓上

此段玲瓏畫有無

西頭一閣最空明  
到此全湖景畢清  
滿眼雲山閒袖手  
看人隄上往來行

閣東過去又重樓  
水態山容宛轉收  
定有幽人和月到  
不辭風露說尋秋

偶占西湖一角春  
漫言煙水屬閒身  
坡仙已去逋仙老  
領畧風光正好人

家家都有好闌干  
曲曲長隄處處寬  
山影遙青波活碧  
居然清極不荒寒



隔道長隄是裏湖隄邊楊柳綠模糊中間不少蒼茫處  
問有高人住也無

楓葉初丹柳未黃遙天縹碧暮煙蒼殘紅忽上王妃塔  
似道恩恩又夕陽

接翅歸鴉掠樹斜分明催客好還家臨行不覺重回首  
幾度殷勤別晚霞

一笑山靈太有情含愁含睇解逢迎歸途還露纏綿態  
不斷青山送進城

卜居雖定願猶違似此湖山付落暉縱有閒情要閒福

何時容我一簑歸

贈馮百史明府

歲

一笑真成兩禿翁卅年心事酒盃中要爲循吏微嫌俗  
喚作詩人便合窮垂老功名猶草草入時梳裏悔恩恩  
闌珊身世嬋媯話挑盡殘燈燄不紅

與百史夜話戲筆成此

我從蘭溪來一夜苦搖兀風緊窗難開孤坐氣鬱勃憶  
君守此土欣然欲相接心急舟轉遲到岸徑投謁蒼蒼  
桐柏山四面翠如滴大江環其前隱此雉樓堞輿夫不

識路縱橫認阡陌左側右復敲前顛後還蹶漸喜林木  
中隱隱見城闕到署日欲昏老隸當關立謂官霜露思  
例不見生客是日君以家忌謝客而君聞我來勢難自藏匿先呼  
作鷄黍告不具巾幘歡然一握手快得吐胸臆略略問  
家常微微詢行迹初猶閒寒暄繼乃雜詠譎鋒利舌欲  
擣語險指頻齧輾轉到詩文荒唐及花月索我新篇章  
出君舊著述搜剔瑕與疵斟酌格與律一字有未安雙  
眉已先結一篇偶生妍微渦忽在頰覃思識苦甘明眼  
洞得失豈靳千秋名寶冀寸心愜近聞趨向歧字面計

工拙譬之口吃人期期語不出又如百衲衣寸寸無完  
帛歐九欠讀書鄭五僅後歇由無力低昂遂覺色塗澤  
吾嘗腹誹之持此自攻擊三北尙三戰十盪仍十決心  
花忽怒生使筆如使鐵五花與八門何處有堅壁寧爲  
胯下辱毋見大敵怯黃河天上來九曲勢盤鬱太華雲  
中青萬仞插梯級唯此一氣通首尾自貫徹鷄口吾皇  
然牛後君豈屑爲問十年來辛苦一鷄肋殘膏與賸瀋  
誓不古人乞工深汰豈難老至智將及但期守堅定勿  
被異牽牽我輩賞且欣旁觀怪而僻慨然發浩歎此語



定誰識我因倦容生君復辨金石搗手驗瘦肥精心翫  
點畫摩挲墨痕香指示釵股折出土爭後先偏有證殘  
缺鼓勇氣未降抗論兩相屹荒荒鷄三號怱怱燭再跋  
爾我方呶呶僮僕笑吃吃笑此兩官人毋乃太惡劇昏  
黑敲門來不知有底急不講朝遷除不究民利益不談  
某否臧不審缺肥瘠到未羅酒漿坐卽要筆墨倒篋尋  
書忙握管惱紙溼晝短夜苦長逞此瀾翻舌三唐與兩  
宋究竟定何物寒可將爲衣饑可得而食蹭蹬理固然  
卅年老不職我時捧茗盤贊歎香且潔忽聞統如聲似  
已前列一笑挂颿行何時畢吾說

得陳厚甫觀察

鍾麟

粵中書卻寄

海內文名五十霜依然兩鬢未全蒼酒盃入手忽飛動  
談塵乍揮森角芒人奪其官天與壽窮能行樂老偏狂  
珠娘拍掌先生唱譜到雲璈第幾章

時填紅樓夢  
曲譜未竟

我是西湖舊屬官舊游回首雜悲歡十年笑語零星記  
一紙淒清宛轉看花月有情勞入夢湖山雖好不勝寒  
刺船海上尋公去醉拗珊瑚作釣竿

題方又義陶春游卷後

我來西湖不計年愛其山水清且妍玩雲弄月信步去  
往往忘歸枕石眠半生落拓或坐此恨少好事同畱連  
披圖風景宛在目春波婉媚春山鮮亂峯濃處翠欲滴  
平坡忽斷雲爲聯傍林隱約露梵宇仄徑斷續通人煙  
有客聯袂似笑語有客指點尋林泉有客倚樹有回顧  
有客興倦凭童肩行吟或已跨澗去探幽或欲窮山顛  
氣象曠遠筆意古疑神疑佛疑飛仙再三展玩暗尋索  
毋乃吾黨諸名賢就中高叟爽識最久蒙莊芝階亦在方

千先是數子者我一遇譚玄說理鋒無前破空快論徹  
三界驚世雄辨讐四筵擺脫萬事號風雅跌蕩千古窮  
鑽研墨華文采溢眉宇吾猶歛衽餘何言卽今紙上呼  
欲出骨象蒼老神完堅此時俊侶定不俗但有觴詠無  
管弦昇平歲月德星聚林巒窈窕風熙恬古稱樂事此  
第一君等特荷天公憐蘭亭縱應讓逸少西園安得誇  
米顛惜哉畫師欠畫我哦詩側帽猶翩翩此圖後人定  
寶貴不然我亦名千年書生賦命太窮薄清游似此緣  
何慳拋圖一笑入山去我自與我相周旋



喜晤戴杏南

葆瑩

明府出示近作賦贈

君吾甥也以翰林出

宰西  
安

拋卻蛾眉第一班  
謫官猶得占谿山  
綠楊陰裏排衙去  
流水聲中聽政還  
地僻自能安教化  
情親且與話鄉關  
相逢莫漫相推許  
慙愧牢之鬢已斑

新詩十首寫淒清  
元白篇章屈宋情  
官愛風華詞跌宕  
人經憂患意和平  
參軍我媿工蠻語  
太史詩還有正聲  
但莫吟壇鬪身手  
古來文苑幾公卿

### 登招寶山作

海濤齧岸無時休  
一山突出當橫流  
高者嵌空低插海  
山不能盡城爲周  
暗礁迴洑互經帶  
屹然巨鎮東南頭  
此是浙東一門戶  
控制日本兼琉球  
舟山雖險究隔海  
得此後顧方無憂  
古人設險有深意  
重關疊戶爲綢繆  
踞守不須極兵力  
一礮勢足摧千艘  
我來守土例巡視  
歎此氣象無與侔  
老僧導我上高閣  
拓窗笑指天容秋  
側身頓覺隘平地  
奮袖便欲凌瀛洲  
試窮目力莽無際  
風來四面聲颼颼  
居民倚海作衣食  
曉夜出沒千漁舟  
自誇涉水若履地  
與潮上下隨沙鷗  
截波一網千萬尾

遂令重利輕田疇然而颶風亦間作風忽掀浪帆難收  
舟橫桅折亂簸蕩此時人力安能謀忍將性命蹈不測  
使我隱爲蒼生愁含愁未已日欲落雲霞倒影尤奇幽  
金波森動萬鱗甲閃閃上挾珊瑚毬惜哉文書集如蝟  
縱有好景難句畱何當襍被徑宿此卧看午夜魚龍浮

青荃詩集卷二終

青荃外集卷一

長洲蔣夔希甫

夢仙謠

我生不能射虎南山頭凌煙有閣空含愁又不能無人  
夜半虛前席宣室荒唐鬼神泣惟當跨鶴騰紫清舉手  
高揖安期生安官局促困塵土哦詩僅作蒼蠅聲出門  
亦愁入門亦愁低頭束縛有如拘囚童僕笑詈妻孥憂  
儒冠誤人殊不淺二十男兒尙貧賤夢殘恟怳聞天鈞  
玉女抗手來相迎醉中彩筆一揮灑下界疑是紅霞生



有憶

恩恩已過百花朝閉戶憑誰慰寂寥  
嗚鳩聲中人病酒  
又逢暮雨怨瀟瀟

漏鼓統如未絕更孤燈錦帳若爲情  
玉闌影蝕金波淚  
似爲愁人特地明

緋桃泣露柳搓綿滿徑落痕已化煙  
欲譜春光不成調  
瑤琴羞澀十三絃

記事

笑把紅牙鬪酒籌周郎從古擅風流  
無多鴛夢恩恩覺

迸作春江一段愁

胡笳曲

丈夫重意氣揮手千黃金古來賢達士  
彈鋏時哀吟胡  
馬戀北嚮越鳥啼夜陰鳴笳志慷慨  
命輕恩自深月從  
故鄉出飛上客子襟故鄉非不思梁際  
巢雙禽江水修  
且廣愁重眉難任

連日痛飲書此自慨

春風曾醉竹西亭柳眼迎人分外青  
倦蛩情懷迷小劫  
浮萍踪跡證雙星夢中鶯月三生恨  
花裏衣衫一色馨

今日重游倍惆悵猶餘籠鳥學丁寧

落日原頭一舉杯舊愁歷歷上心來叩門乞食傷窮鳥  
避俗無名借訪梅笑鬼畫符成左計問人刻楮果何才  
論交畢竟推前輩爲我低回泣死灰

時得陳古華太守札

秦淮雜詩東程竹丁

邦憲

芳心不展是芭蕉誰識胎含豆蔻梢指點簸錢堂下路  
松陵詞客憶垂髫

綠水無波淡到門風前玉立黯消魂怕將私語傳鸚鵡  
認取蛾眉一抹痕

溫尉關心是錦鞵盈盈羅韞印香階蕩絲一縷纏綿甚  
唱徹驪歌且住佳

絮薄花狂感萬端此中嗜好別鹹酸秋風吹冷緜山鶴  
近水簾櫳有暮寒

秦淮水榭雅集

莫笑憑闌指點頻無多金粉迹成陳三分秋影花如月  
一種離情酒借春新舊雨添今昔感雪泥爪認去來因  
明朝鞍馬斜陽路落葉哀蟬最愴神

長別離



相思不堪說況復長別離流水向東去顛顛無還期君  
心諒固結賤妾應自持每見櫻桃開憶君別我時櫻桃  
好顏色隨風舞華姿玉階幾開落思君不我知昨夢在  
君旁覺來常自疑量汝肥與瘠減我閨中肢征衣若爲  
寄亂絲不可治兩地結一心關山能閒之生當長相見  
死當長相思

眞孃墓

臉賸桃花嫩眉和柳色非斷魂如化蝶何處一雙飛  
海棠花下作

惜別詩千首含愁酒一卮春風不相識紅上海棠枝

紅豆詞寄遠

舊拋殘處記當時千結愁心萬縷絲慚愧小名輸蕩子  
一生原不諱相思  
團圓似爾尙多情多少人閒薄倖名訴與東風渾不管  
憑誰種出可憐生

與陸祁生別憶去歲秦淮事

悽悽復悽悽戚戚復戚戚問君何爲長太息今日江頭  
送行客行客自逐春颿歸送客還望春隄暉斜陽欲落

杏不落潛有清淚污春衣春衣宛向春波湔一縷愁痕  
搖柳煙鹿盧宛轉更宛轉絕憶當日調新絃絃聲入耳  
一何苦彈醒春山好眉嫵醉裏憐君著意狂新歌唱徹  
公無渡可憐書劒常飄零明月照見長眉青沈吟此事  
已千古只有嘒鶻嘒太苦嘒鶻獨解爲春愁紅豆拋殘  
亦何補蛾眉壓酒勸爾嘗天孫碎裂芙蓉裳其雨其雨  
怨千里人閒何處尋朝陽愁心欲入骨纈髮悲如雪清  
露斜飛閨苑花濃雲蝕盡瑤臺月月光又復來照人送  
君別君江水濱迢迢流水去不返飛花仍舞樓前春春

風一夜填方寸我爲春心倍成困一點秋痕未肯消背  
人重向姪娥問梁閒燕子終成雙冷雨淒滴飛銀缸何  
堪此日復相別看君挂席凌清江留君不住送君去草  
草分離今太遽後夜離心入夢痕相思渺渺知何處

書板橋雜記後三首

風月南都入夢思眉樓遺迹少人知繁華逝後秋孃老  
腸斷相逢老大時

故國銅駝已劫灰青樓往事賸堪哀誰知一掬滄桑淚  
潦草煙花作記來



休文我亦太情多  
彈指貞元小劫過  
解向秋風尋故迹  
斷香零粉滿青莎

絢春樓夜坐

樓高早見月華明  
笑指銀河一抹生  
暢好夜闌風露冷  
滿身花影坐調箏

春盡

夜雨瀟瀟百感生  
春歸本不爲春情  
櫻桃風急鐙花炮  
腸斷高樓殺尾聲

王述庵

昶

司寇出示蜀後主停空鏡因賦

團團月影含新碧  
冷浸千年土花蝕  
方寸中含萬斛愁  
春叢花影嬌難活  
王八之子原凡兒  
荒淫豈識渠真癡  
蜀山斗絕不能上  
空向鏡背鐫銘辭  
銘辭尙恨春痕促  
照到降書一何速  
鴛鴦夢徒添侍女妝  
鳩形不見流民哭  
蜀檀作匣吳絲紐  
酒闌示客空搔首  
心如明月鏡中縣  
往事茫茫亦何有  
峨眉之山三峽水  
一代消沈已如此  
賸得團圓鏡影寒  
低回鵲眼輕相視  
吁嗟乎古來恨事  
同隕波興亡一例  
風流多天邊明月  
冷相笑金鑑千秋  
柰爾何

夜話

冷眼金蟾有淚痕玉闌干外鎮黃昏柔情一夜飛無著  
細雨閒房說斷魂

新秋夜

水館清無暑露涼如此幽一聲驚過雁含笑指牽牛脈  
脈砧千疊纖纖月兩頭應增團扇怨風到已成秋

初三夜對月卻寄

露華揚清輝隨風入羅帷客心何多愁攬衣起裏回裏  
回更淒切掩戶夢飄忽飛夢不見君含情傍階立洞簫

微咽銀河涼池中驚醒雙鴛鴦凭闌更對纖纖月憶殺  
眉痕爾許長

有寄

夢境無憑計又非暮潮不到舊漁磯銀河有影秋痕薄  
明月難員素魄微對語尙嫌蓬島隔柔情已化彩雲飛  
遙知此夜闌干曲日極樓頭候鴈稀

秋夢二首

秋窗秋雨怨黃昏誰覓亭亭倩女魂不爲如花傷命薄  
羅衣底事染嘸痕



青衫夕集卷一  
十一  
昨宵夢墮瑤臺上一徑修篁護小樓蹋遍綠陰人不見  
桃花無語但含愁

秦淮秋思篇

露珠暗滴黃金井素魄亭亭鑑蛾影銀漢迢遙怨女牛  
關心又見秋容冷抱恨低回放畫橈高樓闕處柳蕭蕭  
可憐紅豆原盈斛一點愁心未許拋拈來紅豆圓如許  
綠窗含涕飛成雨秋風瑟瑟傷高樓夢中秋燕淒涼語  
無語何心問板橋渡頭仍見綠迢迢隔簾高按玲瓏笛  
何處低吹宛轉簫笛聲幽怨簫聲咽脈脈清歌似傷別

振觸僊山萬疊思暮雲衰草連天碧衰草淒迷有故春  
畱仙無計迹都陳杜鵑嗁冷枝頭露誰是當年打檝人  
鵲聲何苦飛猩血分少桃根爲重說一抹微紅院裏花  
數株慘綠林閒月昨宵憶月倚欄看無奈秋來葉正殘  
剔徧銀釭天未曉有人惆悵淚闌干闌干缺處波光定  
中有雙雙淚痕印一夜心隨午夜潮朝來青鬢愁臨鏡  
背愁獨自傷秋風誰識閒愁又易逢吹將波影如眉綠  
生就芙蓉學臉紅愁人鎮擬和愁老淚痕灑遍江南道  
腸斷雲中有雁飛秋魂易綠傷心草

夕陽

殘紅一抹上高樓觸爾當初萬種愁  
落院雨晴人負手  
柳塘風緊客回頭離離遠黛無情碧  
點點歸鴉作意秋  
記否十年墻角影並肩珍重月如鉤

落葉

寒愁寒影鎮西東片片迷離出故宮  
玉笛蟬心千里怨  
銀牀鴛夢五更風有人弔古斜陽裏  
何處尋秋曲院中  
一樣天涯身世感落花飛絮亦飄蓬

促織吟

促織復促織機中思婦長歎息  
流黃空照明月光夜夜  
悲嘯減顏色悲嘯明月員玉階  
空復寒微霜淒淒凋紫  
蘭清砧繁杵聲成單此時少婦愁  
中心此時促織聞哀  
吟千行錦字滴成血相思況復停  
瑤琴琴聲不入耳絃  
鳴欲驚秋碧梧金井東南樓銀河  
已向天西流此時促  
織吟淒涼待來不來空有皇篋中  
手爪不相似何況烏  
嘯在畫梁

有傳秦淮女郎張蓉裳詩云妙藥難醫無病病黃  
金能買不狂狂一語殊爲俊絕時微寒被酒燭



言夕集卷一  
將燼矣爲低回者久之

傳來白下新詩句端的聰明是女兒梅影一櫺燈半爇  
累儂惆悵幾多時

枇杷花裏那人家何日扁舟訪若邪儘有青衫顛顛客  
忍教辜負好琵琶

文人幾輩老無成紅粉飄零又說卿誰琢新詞拍檀板  
一齊譜出斷腸聲

說道

綠陰樓閣幾層梯行過西廊又向西側盞笑誇新釀法

擘箋教補舊時題鬢花冑帽香方覺簾影搖波月漸低  
說道宵淡涼較甚欲歸風露柰前谿

午睡

不捲重簾醉似泥醒來紅日已平西是誰小試溫磨火  
一縷暖香如木犀

寒夜有寄

翠幙低垂玉漏遲輕風翦翦雨絲絲江南難覓伽陵鳥  
手折瓊花寄與誰

廝養才人又一時名花落溷黷然思而今重譜隨鴉曲

豔福都歸賣餅師

漫爇名香爨被池強緘幽怨入新詩鐘鳴古寺鐙殘夜  
記否銀釭背語時

### 江南怨

秋山淡無極楊柳搖空碧停絃慘不思方諸鍊瓊璧絃  
短柱促誰能長曲聲雖短吟聲揚檀槽滴碎眞珠紅桂  
旗蘭旌從兩龍東皇敕下散花檄玉書深閉蓬萊宮蓬  
萊宮中春事小仙妃思余善窈窕滿堂美人獨目成含  
睇含愁又含笑乘風回指銀潢邊思公子兮不得閒嗁

紅慘綠怨終古世無此樂知千年離心一夜飛清露露  
腳空濛溼寒兔人間嗁盡碧雲愁天上遙憐故宮暮此  
時故宮愁思多迢迢怨思遲秋河雙星對月泣淡碧銀  
河聲落凋涼柯涼柯含怨不能已無窮望遠嬋娟子一  
霎韶光換小桃春風自挾飛花起春風與秋月從古無  
分別團團桂魄光使汝無圓缺偶然謫墮依神州鐵笛  
聲裏含春愁夢中有淚不敢灑絲絲已作江南秋

### 舟中夜雨

料峭風來雨暫停櫓聲如雁酒初醒今宵一段淒迷景



言夕集卷一  
二  
準備歸時說與聽

又添幾陣響蕭蕭冷颭桅燈影蕩搖記得箇儂眠未穩  
惱人窗外有芭蕉

和子夜冬歌

愁心不可掇寒月乘淒風夜永念離別爲歡改舊容孤  
燈暖蘭室難會此時情笑指芙蓉褥一夜春風生凝雪  
翳廣宇層冰結故波素顏莫相保流盼到庭柯與歡初  
見日楊柳綠成林歲寒那相覓何處結同心郎心鑪雀  
熱妾意寒蟬鳴鬢衰君不顧草萎春自生

贈蘭卿校書

年來學道世緣輕何苦尊前又識卿人說聰明工作態  
我憐窈窕祝長生從今春到甘無分此後花開憶小名  
爲謝雙矐青一點但傳幽怨莫傳情

雜詩

娜娜亭亭太可憐鬢花斜蹕髮垂肩素娥何日乘鸞下  
與爾風前一鬪妍

輕雲澹蕩日矇矓薄薄綿衣稱體慵花未全開人半醉  
倚闌消受好東風

乍拗新筍過堂前又捉金魚戲水邊章奏東皇好鈐束  
從今莫放海棠顛

問年已到十分春莫怪當筵歎息頻滿眼儘多調笑客  
阿誰真是惜花人

桃花紅綻柳枝妍二月纔過三月天猶恐春歸無覓處  
爲儂繡到枕函邊

合德休言竟體芳阿環紅汗亦尋常自從領畧如蘭氣  
長卧佳人錦瑟旁

當筵催進綠沈瓜拇戰初酣笑語譁一朵猩紅撲酒瓊

是誰脫下鬢邊花

一簇芙蓉傍水邨紅嬌白嫩足消魂緣何甘抱秋心冷

不領春風半日恩

幽蘭著雨正初開泣露吟風帶笑栽記得箇儂名字好  
可能移種傍瑤臺

曲房團坐醉飛觴仙樂敖嘈樂未央客散歌闌春寂寞  
最歡娛處最淒涼

柔櫓輕搖破綠雲段家橋畔去尋君料應占盡湖山秀  
試看眉梢翠十分



最風涼處是西廊雨過銀河耿有光略與憑闌指牛女  
昵人一晌說明皇  
此生未卜況他生莫向雙星乞證明蝶已倦飛花正好  
極無情處恰多情

附記

蘭卿今之薛濤也會學詩亦習畫摘阮撫琴俱臻精  
妙而字尤妍雅可喜特不宥示人時曼生聽香皆遠  
游唯高爽泉以書鳴里中索觀不許至再三以數寸  
牋作二十字又不署款授以筆法意更不屑爽泉時

以爲恨余亦不能強也所居買春閣余爲題名爽泉  
爲之書額屋後枕山小有竹木蒔以雜花頗具疏澹  
空曠之趣山側卽所築小閣三面置窗極明敞於作  
書學畫爲宜閣前後僅兩楹後作寢舍前爲娛賓之  
地闊約二丈裘回徙倚頗饒清適几上筆硯整飭卷  
冊略具餅花酒器錯落相閒壁閒簫管之屬反似點  
綴余愛其幽絕時結伴訪之聞聲卽出檻相招見生  
客又羞澀欲匿誓不戲謔乃宥就坐捧茗爇香而外  
默不吐一字殆不識世閒有寒暄寒暄又作何用者

叩之不會強聒之頰紅作不可耐狀唯聞語涉詩文  
則眉眼閒均露媚態遇其解處憨憨若笑閒發一語  
時落元賞音更清脆客方欣聽而又默然迨客散則  
輒語如簧矣小拂意終夜飲泣百計不能慰余是以  
知其不永年也勸之理佛殊不信宛轉導之笑應曰  
佛太無情我唯願生生世世長作有情人以情死無  
憾淚簌簌下若含愠然心知其隱隱譏余亦含笑不  
應遂意致索莫而散旋卽永訣越五年降乩示詩書  
唐賢手接裙帶問昭王之什是其生時所酷者者憶

嘗秋夜同坐閣外石磴上曼聲誦此往復不置砌蛩  
唧唧若伴清響微風拂鬢茉莉郁芬流螢數點時落  
衣袂紈扇拂之忽上檐際仰視但見竹影搖動月已  
半山蕭寥闐寂不類塵境相顧怡悅覺古來寫韻呢  
桃樂豈勝此旋呼婢瀹茗遂致徹曉今乩語猶及云  
噫結習未忘乃至此邪抑靈鬼相戲邪抑果有往因  
果有後緣如乩語所云邪其可信邪其不可信邪今  
去降乩時忽忽又二十年矣春早睡醒紙帳乍揭頓  
聞異香葢室中盆蘭初放也灌洗禮誦畢出步廊閒



廊作磬折形旁通書堂時新雨乍晴循檻散步風來  
著面已有春意殘梅半落香雪滿庭玉蘭欲吐尙未  
舒葉旁有紅薔一架蕊亦怒生矣此堂初成時曾賦  
詩十章有牡丹富貴桃花俗不許庭中占好春之句  
雖意別有在然竟缺此二種檻側忽棲一蜨若倦不  
能飛者蓋氣尙未蘇也因悟東風一拂萬物皆春欲  
暖先寒含此生意氣機默運卽天地亦順生尅之常  
不能自主彼泣露傷秋之侶得毋自染情障因轉至  
堂中倚榻稍憩架上書忽翻動擷視得小碧牋數張

乃三十年前蘭卿錄余嬉游雜作墨光浮動姿態橫  
溢嗚呼美人黃土而紙猶舊翠如新石火光中誰堪  
把玩者哉心怦怦欲動默自訟曰此殆所謂秦人不  
自悲而後人代爲悲之者非邪吾過矣吾過矣爰滌  
硯吮豪戲仿其體亦錄一通恨無俊腕遜其一種柔  
情逸態譬之雙鴻竝翔各標韻致而已惜彩雲已散  
不得相視而笑也寫畢侍婢走報蘭忽萎落亦一奇  
也魂而有知豈尙戀吾左右弄此狡獪邪傷哉若是  
行且又將墮落矣柰何如何道光壬寅春日希甫記

青荃外集卷一終

青荃外集卷二

長洲蔣夔希甫

憶春詞

東風枉費一春恩  
採到蘼蕪有斷魂  
冷雨又飛新燕子  
空江誰問舊桃根  
笙歌寥落花閒路  
環佩淒涼月下門  
南浦依然青不了  
漫勞芳草怨王孫  
風到橫塘着意柔  
慣攜小隊作清游  
綠蕪門巷初停騎  
斜日簾櫳又放舟  
取次衝筵時正拍  
無端縱酒不關愁  
憐他一片繁華地  
收拾春心有畫樓



過盡桐橋畫不成  
花花草草總多情  
輕籠弱挽家家玉  
競鬪新聲樹樹鶯  
燈火一湖喧  
夜月管絃幾處趁  
初晴  
瑤臺倘注星妃冊  
來向文鴛問小名

青粉墻邊卽謝家  
關心如水好年華  
愁中歲月雙眉瘦  
鏡裏光陰一笑差  
桃頰粉融朝帶酒  
蓮鉤錦蹴步生花  
劇憐未了閒鍼綫  
耐盡梧桐月影斜

綠鬢慵梳任拂肩  
爲調鸚鵡出堂前  
十分靚覷諸姬妬  
一種聰明衆口憐  
無賴花枝還入戶  
有情春色已連天  
而今料亦工愁思  
莫遣飛花撲繡筵

月榭風廊別幾時  
縱相逢處諱相思  
徐孺顚顚蕭孺弱  
碧玉嬌憨紫玉癡  
些子便迷三里霧  
艱辛空絡幾絢絲  
齊梁宮體西崑格  
誰解瓊瓏唱我詩

竹西高閣餞殘春  
記得人扶帶欠伸  
嬌極居然花沒骨  
愁多翻厭酒沾脣  
望中天遠歸何處  
眼底鶯飛去有因  
吹老碧桃吹瘦柳  
此生知爲幾傷神

柔波采采綠侵扉  
不禮眞如禮玉妃  
團扇乍迴花綽約  
中門未攏語依稀  
霓裳曲裏年華小  
朱鳥窗前影事非  
瞥眼風光合惆悵  
空留後約指薔薇

綠水圍天嫩似秋半塘煙月好句留鸞箋象管春修禊  
玉笛銀箏夜蕩舟蜨爲尋花時奪路柳如招客正當樓  
蘭成今已飄零慣問有何人續後游

冶游絕愛玉驄驕亞字城西路不遙扇影瞥從簾底度  
蜨魂已向水邊銷人間青鳥知難覓天半朱霞或可招  
鞭輭帽敲餘薄醉最生踈處是虹橋

何苦怱怱去玉京多情翻喚作無情蛾眉倘不邀天妒  
馬角應當爲客生花氣著人偏中酒春心到處有嗁鶯  
未知此去橫塘月誰復盈盈打槳迎

銀潢耿耿不生波如此風光客裏過水暖鴛鴦眠月穩  
春濃蝴蝶抱香多誰描柳葉前番黛銷否梨花舊日渦  
畢竟未慚修道力青鐙紅雨伴維摩

偶有所矚各贈一律

渠儂生性太無聊不愛嬉游慣寂寥稍稍清談推意嬾  
些些閒事說心焦略知詩便三分韻不戴花猶一味嬌  
底事阿孃頻嗔喝爲貪涼月坐深宵

未梳頭已下堦行不是澆花作麼生捉得柳綿搓作綫  
捲將竹葉學吹笙無端嗔客還含笑忽地撩人別有情



莫更欺他年紀小簷錢時節眼偏明

卽席

誰爲吾曹駐景光停杯試與話斜陽美人末路思歸佛  
才子中年暗減狂儘有文章供白眼曾將粉黛壓紅妝  
微生何事堪留玩珍重今朝共此觴

初過玩月樓作

幾殘紅鏝簇畫樓果然此地好句留同邀素月殷勤坐  
尙倚香篝宛轉羞話到家常情漸密訴殘衷曲兩生愁  
金閨不少盈盈女嫁得王昌到白頭

重過玩月樓戲調之

爲誰瘦損爲誰愁繡佛牀前淚未收我本無情甘薄倖  
卿原癡想太綢繆須知福要前生種豈有緣從此度休  
好倚闌干共調笑十分春已到枝頭

金華道中留別

未曾識面已聞名幾日同爲畫裏行知我難留催起早  
干卿何事忽愁生調羹心細諳儂意煮茗香濃識水清  
收疊琴書今去也只添珍重一聲聲

春早過玩月樓題壁

言外集卷二  
四  
綠楊影裏小紅樓樓上珠簾尙未收滿榻幽香濃似酒  
半窗澹日冷於秋晝長偏帶三分病春到唯添一味愁  
十二闌干同倚徧纔開妝閣喚梳頭

買春閣卽事

露華如水漏沈沈不許曹騰睡思侵昵我翦燈描粉本  
陪他待月理瑤琴將顰忽笑含嬌慣欲語還停作態淡  
縱有瓊瓏一枝筆幾時寫出美人心

夢裏

麝已成塵玉化煙輕將今日換從前有情便惹三生劫

何福能消此段緣是我疎狂應我恨問誰辜負望誰憐  
縱饒夢裏殷勤訴知道春歸若箇邊

夢游吟一百首

絲絲軟柳未藏鴉來訪吳宮第一花萬樹瓊枝嬾回顧  
箇人占斷好年華

宜嗔宜喜態溫存掃盡人間粉黛痕一種天生好情況  
揉花爲骨玉爲魂

含羞已是轉長廊攏鬢低回過畫堂隔著桃花聞一笑  
綠悻悻處換衣裳



言外集卷二  
五  
廊內鸚哥喚客留雙鬢報道更梳頭慙慙料得難迴避  
還擁香篝不下樓

亦知此客不尋常旋罷矜持笑語長翻累阿孃渾不信  
親來窗下點茶湯

忽覺春山兩葉低似嫌日影已平西問人可好從容坐  
正有新圖乞面題

幾樹桃花映水紅數株楊柳半隨風畫師倘識東君意  
添對鴛鴦便不同

幾番覩覩讀新詩月上窗櫺已一絲商略明朝排小坐

紫藤花下可相宐

日影著花花壓檐海南初燼夢猶甜怪他香氣忽飄散

燕子一雙來撲簾

秀項纖腰更削肩蛾眉澹掃倍生妍自言病後雙鬢薄  
不戴花鈿近半年

譜得新詞號惱公絃絃彈出玉璫瓏不知何與閨中事  
反惹秋波一霎紅

玉紙紅窗六角亭幾聲清磬響丁零料因噩夢恁恁覺  
起誦西天貝葉經

漏聲點點報銅壺小病欣將藥裏疏閒弄玉環雙歎息  
不知天上月圓無

西風一夜怨齊紈淡墨羅衫頓覺寒怪底盆蘭香漸減  
倚闌同向雨中看

沈沈嬌喘細難支倚枕猶吟夢裏詩繡被叢殘親疊起  
怕儂不肖坐多時

不忍離卿忍撇卿連宵窗外等鷄鳴癡心屢向庸醫問  
送別還扶小婢行

鎮日垂簾避太陽微風著體又嫌涼坐來但覺氛氲甚

不辨花香是藥香

連朝天氣木樨蒸肺病時愁熱不勝梨汁半甌剛欲呷  
侍兒解意與先冰

長眉還似舊時青欲語無聲汗忽停太息曇花原一現  
阿孃空怨藥無靈

撼卻東皇第一枝留仙無術枉相思幢幢燈影荒荒月  
又到初三下九時

何曾拋卻舊鴛盟繡佛幡邊淚暗傾恰喜壇前乞回向  
度師親說有來生



小桃鎮日逞天斜強向東風管歲華有客無言閒弄筆  
生綃一幅寫梅花

傳來青眼有崔徽寫我新詩上畫幃未免轉添惆悵在  
量腰知減舊時圍

已聞環珮響瓊瓏想過西廊又轉東行到畫堂剛萬福  
不知何事臉緋紅

蹋徧迴廊路半迷閒房曲折嵌玻璃模糊醉眼閒評點  
最好花枝簇戶低

隔架圍屏繞北行亂書堆裏一琴橫何當月白風淒夜

來聽霜天落雁聲

斷無人信解相思似有情曾笑我癡忽注橫波飛急瑣  
一聲錯喚酒闌時

折得梨花照眼明擘箋分韻鬪新聲迴眸一笑停湘管  
活色生香賦不成

一路人傳玉比肩偶然聯騎出花前興酣更與沿塘去  
笑撚垂楊入綠煙

桃笙竹枕畫闌西風裏楊花著意迷如此星辰如此月  
今宵證取燕雙棲

小鬟籠燭苦相催更勸殷勤盡一杯說道曉來還見面  
明朝阿母壽筵開

翠翹金鳳樣鮮新愛好由來自一生聽說時興裙百襴  
商量連夜要裁成

妝成纔換袂衣裳手揭湘簾到畫廊隔著玻璃屬將息  
漫天絲雨十分涼

連日開筵爲賞春牡丹今歲倍精神後朝應請閨中伴  
折柬須邀有興人

田田荷葉曲闌東起早來看幾朵紅忽地背花廊外坐

貪他南面過堂風

要看新糊著色屏強人夜過水西廳月明滿地虬龍影  
小膽惺忪怯未經

詩要聰明不在多偶然天籟月生波欲拈玉葉排新句

露冷霜淒奈爾何

有寄懷句云微風不成浪  
明月又生波殆成詩讖

仍見樓窗六扇開夕陽冷照舊池臺疎疎楊柳低低檻  
憶得花時醉幾回

又對新歡憶舊知謝家姊妹例能詩年前記否曾雙笑  
髮正垂肩學畫眉



言外集卷二  
九  
一回相見一回親漸漸知心語笑真同倚闌干數新筍  
嬾晴天氣最宜人

內堂清宴夜深排一笑拋人去不回絲管聲停鐙影亂  
悄扶殘醉入簾來

錦幙重重護好春冷香幽韻兩相親梅花也有修來福  
插到妝臺近玉人

去果非邪住亦難忽嗔忽喜兩眉端生成宛轉隨嬾性  
三日躊躇意未安

慊慊已覺損腰支澹澹渾非舊日眉還是逢迎還巧笑

強言小別不多時

迢迢驛路比天長消息何由到故鄉十丈塵沙三尺雪  
鏡中好護舊容光

半醉歸來路不明東園偶作片時行驚心水面瓊花影  
隔扇疎簾喚小名

何曾行處有隄防大好從容話夕陽一笑明明都有定  
不須過後苦思量

詢我曾添幾度愁緣何前作越中游明年還愿須同去  
聽說西湖勝虎邱

蕭郎珍重玉釵恩每到橫塘一斷魂今日討春重結伴  
又來花下獸敲門

正是鮭魚上市時牡丹花下賭新詩縱饒酒令森嚴甚  
百罰深杯總不辭

翠神珠襦態自華豐容盛鬢玉無瑕教儂急欲低頭拜  
此是瑤臺富貴花

春滿蓬萊第一峰眾仙排席各西東簫聲似鳳歌如髮  
僥倖樓頭昨夜風

鮮花幽草巧安排新式疎籬樣更佳曲折尋秋嫌路仄

薔薇又習小金釵

蕩絲嫌嫵菱嫌粗蓮子新鮮上匙初說趁曉涼親剝取  
卻拋半日繡工夫

祕閣初聞放翦聲回環花徑拂花行似誇舊譜新翻得  
月影一身好奏笙

暖風蒸出半天霞起拓窗紗日已斜一朵生紅偏刺眼  
枕旁誰脫鬢邊花

不住薰籠換好香綿衣薄薄正新裝日來渾似霉天氣  
未到中秋已許涼



看盤金線繡芙蓉樣儘翻新道未工若得羅巾長在手  
此生何敢羨春風

不曾相約不曾知忽有今朝見面時檀板一聲雙淚落  
管絃叢裏訴相思

訴我今爲失意人極歡娛處極酸辛風姨逞慣輕狂性  
鉤勒名花又一春

青衫紅袖兩蹉跎話到傷心轉不多涼月半庭人半醉  
起攜纖手望銀河

人間恩怨本難齊儘有前因在自迷開作秋花知薄命

化爲春燕怯單棲

一天霉雨正新寒起坐攤書意少歡好喚渠儂作清讌  
含桃初綻脆梅酸

春風拂徧好樓臺誰遣名花入夢來慚愧玉驄嘶過處  
勞他簾外立多回

碧玉緣何慣小家今朝親與試鉛華漫山桃李都麤俗  
來看海棠初著花

姮娥也說好風標占盡人天一段嬌月作精神玉爲骨  
花欺顏色柳輸腰

相隔何曾有半年相逢禮數越周旋無端學得矜莊態  
怕理新歌嬾簸錢

玉人邀我破清愁那管宵深自蕩舟月到中天圓不動  
起攏衫袖立船頭

龍舟幾隊衆喧傳鄰女相邀便上船笑把羅巾齊拭面  
不施脂粉自天然

雲堂水榭快新涼重與通頭整晚粧玉輦紅鼓嬌似醉  
喚移竹榻放西廊

小年情性亦堪憐愛揀花枝插鬢邊愁殺珠蘭將罷市

不知藍菊可新鮮

非關蘭麝染衣裳合德由來竟體香但向風前常掩抑  
不容領略教思量

畫樓夜永賭藏鉤釧動花飛笑不休銀燭光中紅玉輦  
春情都上小眉頭

綠紗窗外一聲鶯半欲天陰半欲晴渾似去年春氣味  
錦衾羅褥喜單輕

紅鱗卅六手親縫中有相思寄萬重更把玉環平脫與  
道籠纖指近嫌鬆



正有相思恨未銷綠闌飛出意中簫長陵檢點閒花草  
輪與紅梨一段嬌

玉痕印枕夢猶迷已報筵前客到齊喚起恩恩成一笑  
白荷花畔日剛西

百萬呼盧綺閣巔遺珠賸串散如煙惱他一擲偏贏得  
不信全紅在那邊

琉璃硯匣鎮隨身不寫黃庭便洛神阿母暗憐同伴笑  
今朝又見管夫人

食單昨夜費商量小品零星半上方未到酒闌嫌坐久

悄呼小婢進檳榔

盡說江東有二喬慧孃纖手麗孃腰不妨小作逢場戲  
酒冽香溫又此宵

宜興壺子舊曾誇時樣新興是白沙自汲清泉看火候  
鄰姬新餉雨前茶

可能真與世忘機澹埽蛾眉謝舞衣手把道書慵起立  
殘梅如雪傍人飛

畧容小坐話綢繆不許相思不許愁浩劫難修清淨骨  
非關羞澀愛低頭

上真知我厭清寒勸我來尋月殿歡玉液纔斟香滿室  
春情浮動兩眉端

天孫今日宴羣真弄玉吹簫子晉笙奏到瑤池新法曲  
濛濛但覺紫雲生

智瓊嬌小髮纔梳匿笑佯羞避客初自是仙家多禮數  
錯疑見面尙生疏

曉來清課幾曾停籠鳥朝朝伴誦經軟語撩他微暈頰  
懺除先合禮雙星

月痕已與畫簷齊拇戰方酣眼半迷背地暗將金瑣閣

抽身潛向海棠西

檢徧花枝意少歡澹紅香白等閒看自迴孤枕沈沈睡  
萬一乘風到廣寒

驚心如水平好年華歲歲仙壇見落花莫聽游蜂訴消息  
繡簾一尺卽天涯

慘綠生衣失舊香殷勤猶繫紫絲囊封題一紙重拈起  
澹墨敲斜字數行

新圖一幅畫堂前真箇風情尙儼然略作道家裝更好  
倒持如意白雲邊



已化巫山嶺上雲斷無青鳥致殷勤那知合眼分明在  
百蜨輕衫淺絳裙

當初宵信有如今澹盡花前舊日心月地雲堦仍好在  
斷無人處一沈吟

緣淺緣深不自由月沈西去水東流空將碎雨零煙恨  
付與秦簫楚瑟愁

此心終覺負雙成何日瑤臺與證明鼎鼎百年容易過  
會須攜手御風行

笙歌又作少時歡不忍重聞況宵看騎省清愁元相怨

舉頭怕對月團圓

蠹蝕香殘一卷詩行行玉手界烏絲卽今被酒閒翻擷  
又向風前立少時

落花其柰曉風何弱質頻經細馬馱一霎綵雲都捲盡  
銀河真箇有風波

書虬仙詩後

并序

甲辰夏夜同人偶爲扶鸞之戲先示降壇詩云  
鷓絃撥斷玉琵琶翠鈿金釵葬落花卍字闌干  
空月上更無人影碧窗紗自稱西冷女子葉氏

年十八適姑孰遭悍婦謠詠齋恨而亡星噶生  
災月將畢命今廿年矣游魂如絮飄泊天涯問  
得脫生否答云輪迴苦趣何必再嘗唯學誦金  
剛以求解脫余在旁誦玉環領畧夫妻味之句  
卽書云從此人閒不再生正妾今日之謂也詢  
以近事則云小魂靈偷憩夜臺安能豫知人閒  
休咎邪連書去字共勸少留則又云自參靜寂  
日有清課不得常塵光霽且幽明路隔豈可久  
貪情話也忽靈風颯然乜寂不動因悼以詩

游魂如絮忽飛來  
軟語酸辛劇可哀  
有此豔情無豔福  
天公何不稍憐才

生原無味死何歡  
爲爾躊躇兩未安  
還祝生天須及早  
夜臺風月太淒寒

翠鈿金釵已化塵  
琵琶撥斷冷無聲  
不如嫁作農家婦  
送餼提筐了一生

筆端方歎好才華  
徑欲乘風不可遮  
急與挑燈描小影  
想應瘦損似梅花

有才無命到紅裙  
脫口清新世少羣  
末路文人齊一哭



東坡原不為朝雲

青荃世四  
乎西崑未  
為近音作  
惜板存吳  
於板罅中  
如因跋以

卷余初學詩時即喜誦之其外集二卷純  
免有傷詩教然其氣韻高超詞旨新  
家所未有甲子以後此集失去每一念及  
門兵燹後無從再購矣前月偶清釐書  
得之如在他鄉遇親好如於獨夜來故人其  
誌嚮往吾人氏後

青荃外集卷二終



吳門通關坊  
集文齋刻



書名	春荃詩集		
冊數	1	版別	紙
價 值	10.00		
	字第5556		號
北京市圖書出版業同業公會印製			

